

# EMBASSY OF THE UNITED STATES OF AMERICA

PUBLIC AFFAIRS SECTION

TEL: 880-2-883-7150-4

FAX: 880-2-9881677, 9885688

E-MAIL: DhakaPA@state.gov

WEBSITE: <http://dhaka.usembassy.gov>



## সংবাদ বিজ্ঞপ্তি

### দুর্নীতির বিরুদ্ধে লড়াইয়ে সহায়তা করতে যুক্তরাষ্ট্র সরকার শুরু করেছে “প্রগতি”

এই প্রকল্পের বহুমুখী কার্যক্রম সরকারি তহবিলের স্বচ্ছতা ও জবাবদিহিতাকে তুলে ধরবে

ঢাকা, ১৫ই এপ্রিল -- যুক্তরাষ্ট্র সরকার দেশটির আন্তর্জাতিক উন্নয়ন সংস্থা বা 'ইউএসএআইডি'-র মাধ্যমে সম্প্রতি "প্রগতি" (PROGATI) নামে চার বছর মেয়াদি একটি প্রকল্পের কাজ শুরু করেছে। এই প্রকল্পের কাজ হচ্ছে সরকারি তহবিলের ওপর জনগণের নজরদারি জোরদারের মাধ্যমে দুর্নীতি নিয়ন্ত্রণ করা। "Promoting Governance, Accountability, Transparency and Integrity" -- সুশাসন, জবাবদিহিতা, স্বচ্ছতা এবং শুদ্ধতার প্রসার -- এই সকল ইংরেজি শব্দের আদ্যাক্ষরগুলোর সমন্বয়ে গঠিত এই "PROGATI" বা 'প্রগতি' সরকারি সম্পদের উন্নত পরিচালনা ব্যবস্থার প্রসারে সরকারি সংস্থা, নাগরিক সমাজের বিভিন্ন সংগঠন, বেসরকারি সংস্থা এবং সংবাদ মাধ্যমগুলোর সাথে এক যোগে কাজ করবে।

চারটি প্রতিপাদ্য ক্ষেত্রে 'প্রগতি' অংশগ্রহণমূলক কার্যক্রম শুরু করবে। প্রথমত, এটি পরবর্তী সংসদের সাথে কাজ করবে এবং জাতীয় বাজেটের ব্যবস্থাপনা এবং সরকারি ব্যয় পর্যবেক্ষণে সংসদকে সহায়তা করবে। দ্বিতীয়ত, জনগণের সাথে অধিকতর স্বচ্ছ ও জবাবদিহিমূলক একটি সম্পর্ক গড়ে তুলতে জনগণের সম্পদের ব্যবহার পর্যবেক্ষণে 'প্রগতি' সহায়তা করবে। তৃতীয়ত, জাতীয় বাজেট প্রক্রিয়ায় নাগরিকদের বোধগম্যতা এবং অংশগ্রহণ বৃদ্ধি করতে সংস্কার প্রসারে গুরুত্বপূর্ণ ভূমিকা রাখে এমন নাগরিক সমাজ সংগঠনগুলোর সাথে 'প্রগতি' সহযোগিতা করবে। চতুর্থত, পেশাগত মান বৃদ্ধি এবং দুর্নীতি বিষয়ক প্রতিবেদনকে উৎসাহিত করে এমন অনুসন্ধানী প্রতিবেদনের সংস্কৃতি গড়ে তুলতে এই প্রকল্প গণমাধ্যম প্রতিষ্ঠানসমূহ এবং সাংবাদিকদের সাথে কাজ করবে।

অংশগ্রহণমূলক গণতন্ত্রের জন্য বাংলাদেশের দক্ষতা বৃদ্ধি করা, সুশাসন নিশ্চিত করে দেশের এমন প্রতিষ্ঠানগুলোকে জোরদার করা এবং সহনশীলতার সংস্কৃতিকে সমর্থন যোগানোর জন্য যুক্তরাষ্ট্র সরকার এ দেশের বেসরকারি সংস্থাসমূহ, স্থানীয় সরকার এবং প্রধান রাজনৈতিক দলগুলোর সাথে ঘনিষ্ঠভাবে কাজ করে থাকে। যুক্তরাষ্ট্র সরকারের কার্যক্রম রাজনৈতিক দলের সংস্কার ও গ্রহণযোগ্য নির্বাচন অনুষ্ঠানে সহায়তা করে, স্বচ্ছ ও জবাবদিহিমূলক সরকার গঠনে উৎসাহিত করে, কার্যকর ও অংশগ্রহণমূলক স্থানীয় সরকার ব্যবস্থাকে সহায়তা করে, মানব পাচার প্রতিরোধ করে এবং প্রভাবশালী নেতাদের মাধ্যমে নাগরিক সম্পৃক্ততাকে উৎসাহিত করে।

দুর্যোগ মোকাবেলা, দারিদ্র্য দূরীকরণ এবং গণতান্ত্রিক সংস্কারে সংশ্লিষ্ট হওয়ার ক্ষেত্রে বাংলাদেশকে সহায়তা করার সুদীর্ঘ ইতিহাস রয়েছে যুক্তরাষ্ট্র সরকারের। 'ইউএসএআইডি' এবং অন্যান্য সংস্থার মাধ্যমে যুক্তরাষ্ট্র সরকার বাংলাদেশকে যে সকল ক্ষেত্রে সহায়তা দিয়ে থাকে তার মধ্যে রয়েছে -- অবাধ, নিরপেক্ষ এবং বিশ্বাসযোগ্য নির্বাচনের মাধ্যমে গণতন্ত্রে প্রত্যাবর্তন এবং অধিকতর স্বচ্ছ ও জবাবদিহিমূলক শাসন ব্যবস্থা প্রণয়নে সহায়তা, একটি অধিকতর শিক্ষিত, সুস্থতর ও অধিকতর উৎপাদনশীল জনগোষ্ঠীর জন্য সহায়তা প্রদান এবং ন্যায্য অর্থনৈতিক প্রবৃদ্ধি, উন্নত খাদ্য নিরাপত্তা ব্যবস্থা ও দুর্যোগ প্রশমনের মাধ্যমে অর্থনৈতিক সুবিধাদি বৃদ্ধি করতে সহায়তা প্রদান।

=====

জিআর/ ২০০৮

**দ্রষ্টব্য:** এই নিবন্ধের ইংরেজি ভাষ্য 'আমেরিকান সেন্টার'-এ পাওয়া যাবে। যদি আপনি ইংরেজি ভাষ্যটি পেতে আগ্রহী হন, তবে 'আমেরিকান সেন্টার'-এর প্রেস সেকশনে (টেলিফোন: ৮৮৩৭১৫০-৪, ফ্যাক্স: ৯৮৮৫৬৮৮; ই-মেইল: [DhakaPA@state.gov](mailto:DhakaPA@state.gov) এবং ওয়েবসাইট: [dhaka.usembassy.gov](http://dhaka.usembassy.gov)) যোগাযোগ করুন।